

岑襄勤公年譜

岑襄勤公年譜卷六

己卯光緒五年公五十一歲

正月至清江浦見漕督文彬公渡河至王家營賃車陸行紆道
至郟縣謁亞聖孟子廟至曲阜謁

至聖先師廟見衍聖公孔令詒觀金絲堂彝器謁復聖顏子廟又偕
衍聖公孔令詒出謁

聖林及述聖子思子墓 是月杪過保定見大學士直隸總督李公
鴻章 二月十二日入都門寓東安門外賢良寺 十三日昧
爽趨

朝見軍機大臣於朝房蒙

召見奏對數十語退朝謁恭親王於邸第及軍機大臣寶鋆公等

十四日又

召見奏對數十語退朝旋移寓城南興盛寺又移下斜街孫宅

閏三月十三日內閣奉

上諭貴州巡撫著岑毓英補授並加兵部尚書銜欽此 十四日選

摺叩謝

天恩 二十八日具摺請

訓蒙

召見奏對語尤詳移時退出 是月公子春澤奉諭入京援例報捐

主事籤分工部學習 四月十二日公出都經過河南湖北湖

南各省 是月公子春榮考試廩生五月引

見奉

硃筆圈出外用旋改捐郎中籤分戶部學習行走 六月二十五日
公行抵貴州鎮遠府接受貴州巡撫關防 二十七日拜發抵
黔接印日期一摺 是月公子春莫自桂林送眷赴黔值公洪
江命先行入省 七月初四日專摺奏行抵下游聞梵靜山尙
有餘匪飭屬籌辦大概情形附片奏遵

旨議道員羅應旒條陳黔事尙有可採容俟詳查復奏又片奏布
政使林肇元等飭回本任 是日公起程赴黔省初十日抵省
署 八月初四日摺奏籌商整頓吏治營伍情形附片奏道員

易佩紳曾紀鳳委管營務會辦上下游改防勇爲練軍又片奏
本料鄉試照例入闈監臨又具奏遵

旨詳細表實復陳已故革職巡撫徐之銘被參情節一摺又摺奏湖
南協營捐局第四十二卯請獎 初六日摺奏黔渝成三局收
捐請獎 是日公入闈監臨 二十日公出闈還署 二十二
日公三子春澤生子德因 九月初六日具奏考驗實缺武員
一摺附片奏候補武員嚴飭操練候考又片奏委道員梁金詒
吳寶森駐催川鄂協餉 十二日摺奏遵

旨通盤籌畫力求撙節核實每年應需餉項數目附片奏先撥餉款
以清欠餉又片奏閩省協餉請改撥滬漢關款又片奏貴西道

衙署移建畢節又摺奏湖北協黔捐局第四十卯請獎 二十
八日摺奏湖南捐局第四十三卯請獎 十月初二日公下閣
與校武鄉試提督張文德會考 初八日訪聞哥老會匪已革
總兵楊海泰等歃血結盟圍占省城謀爲不軌將於初九夜起
事卽日密派武營將弁帶兵查拏五日之內先後拏獲匪首楊
海泰等八名發司道訊明正法 十五日試竣取中武舉黃藻
章等二十五名 二十五日具奏拏獲會匪楊海泰等訊明正
法一摺附片奏官軍攻拔梵靜山賊營並現籌圍勦餘匪情形
又片奏土會各匪劫盜重犯請就地懲辦又片奏以滇軍撥補
上游練軍用資戒備 十一月初三日具奏裁遣冗員一摺又

代奏藩司林肇元陳請

陛見一摺又摺奏派員統帶練軍接換湘省防營 二十日具摺奏
改防勇爲練軍挑補綠營馬步戰兵仍留防守要隘擬議章程
辦理一摺並章程十二條又摺奏下游新設礮屯未臻妥善籌
議更正又片奏記名提督何秀林等留黔差委 是月委辦梵
靜山知府劉廷忠丁憂寇乘換防之際復出竄擾公派貴東道
易佩紳記名提督何秀林馳往會勦檄各屬文武分布堵截疊
有新擒附近地方稍安然寇踞朝陽寺舉賢溪老巢山林險阻
未能深入大創之也 十二月十五日公文子春煦生子德溥
十八日具摺奏查禁私鑄及行使小錢

庚辰光緒六年公五十二歲

正月二十四日摺奏常年兵餉有撥無解請另撥有著之餉定
限報解附片奏催各省迅解減成月餉暨指撥的餉又摺奏遴
員接辦梵靜山餘匪疊有斬擒附近地方稍安附片奏委道員
張煦署理臬司又附奏權授副將英商麥士尼爲能著有勞績
請給二品封典及回國川資 二月初四日具奏保獎學獲哥
老會匪十一員弁一摺附片奏道員張日崙延不赴湘催餉請
以原品休致 時御史黃元善戈靖先後奏請直省宜裁減勇
營歸併各局奉

上諭通飭辦理

十五日公具摺奏稱

臣

自上年秋到黔後易勇爲

兵以馬步戰兵爲練軍防守要隘人數悉照兵額營名皆仍舊制以留營守兵分防城池塘汛曾經具奏交議至黔省各局如碭屯志書等局早經裁撤城防保甲採訪清查等局已併入善後總局辦理從前黔省兵餉局費各項開支每歲用銀三百萬二百八十餘萬兩不等現在歲支銀不過一百八十萬兩已屬刻苦節省並無浮費 同日奏擬同提臣分校營伍並親往梵靜山查辦恭報出省日期一摺附片奏順路查看地方情形又附奏湖南鳳凰屬苗匪滋事逼近松桃分派員弁防勦又摺奏銅仁府知府汪元慶調補貴陽府知府 十七日公出省赴上游校閱大定黔西畢赤歸化平遠等營以次皆竣 時四川

總督丁文誠公寶楨亦出閱蜀邊營伍三月初八日公與會於畢節談讌三日 二十一日公還省署辦理秋審 二十九日馳摺奏黔省官兵會勦湖南鳳凰廳屬之董倒寨苗匪現已撲滅地方安靖附片奏何秀林等攻破梵靜山朝陽寺舉賢溪賊巢又片奏奉

旨派 臣 查閱本年貴州營伍俟校閱省標後遵卽出省查閱又摺奏補報湖南協黔捐局第四十四卯收捐請獎 四月初六日專摺奏謝年終

恩賞又奏黔省歷年軍需收支各款按季造冊送部核銷一摺附片奏派道員蕭德揆換防黎平屬白水冲潮等處又片奏各捐局

報銷玩延又片奏叅知府聶培廉浮收釐金請以通判降補又
摺奏在籍革員饒文斗浮收社穀按律定擬附片奏委道員顏
培鼎接辦報銷局務又片奏知府馮翥鵬等接辦常德九江各
轉運局 是日公出省赴下游校閱營伍 二十六日馳抵楚
靜山軍營是時山寇經官軍勦捕彌年殲斃已衆餘黨腐聚金
頂後洞公往覘形勢不能力攻命布長圍嚴斷接濟會得寇謀
貸其死令誘寇出窺五月初九夜寇竄出至觀音巖殲焉擒寇
酋楊滿等十九名楚靜山肅清 十二三日校閱銅仁松桃各
營 十四日公在烏羅甸大營誥明楊滿等正法 十七日馳
摺奏搜勦楚靜山積匪全股殄滅附片奏冒暑患痢擬暫回省

調治又摺奏記名提督林從太等請借補永安協等缺 公尋
起程順道校閱思南石阡遵義長寨各營完竣 六月初六日
還省署 二十四日摺奏請催欠餉附片奏威寧鎮總兵鍾開
蘭請

旨陞見並請給假回籍省親又附奏總兵鄧有德張保和請卹 七
月初六日摺奏道員蕭德揆等積勞瘵故請卹 二十七日附
片奏四川渠縣知縣杜瑞徵捐黔省恤養銀四千兩請將該員
三代名氏在籍合建一坊又附奏陳明決週蠶役徐治家等罪
狀 八月初六日摺奏移置銅仁安化縣治劃正經界附片奏
長寨同知羅斛州判擬互易改設又片奏暑退病痊仍出省校

閩營伍 是日公出省赴上游閱安順威寧安義永安定廣長
靖安南册亨普安各營以次校畢於威寧會雲貴總督劉公長
佑談讌二日 九月初一日桐梓縣會匪畢香亭糾黨踞老廠
楊村壩爲亂初三日犯縣城爲兵圍擊敗擒斬寇目五人公時
駐普安檄調將弁會勦初五日破老廠初八日破楊村壩追至
仁懷縣屬尖茶溪蹙寇入水殄除淨盡獲畢香亭田洪山解省
訊辦 二十五日摺奏黔省歷年陣亡殉難官紳婦女開單請
卹附片奏重慶捐局十三次至二十四次收捐請獎 十月初
五日公還省署 十八日訊明畢香亭田洪山正法 十九日
附片奏殉難知縣孫翹江專祠請列入祀典 二十日馳摺奏

撲滅桐梓縣會匪地方已靖 是日公出省沿途校閱新添都
勻上江古州黎平朗洞荔波下江清江鎮遠台拱天柱各營十
一月二十日行次清平縣調閱丹江黃平平越凱里四營二十
七日還省署 十二月初九日公親臨校場閱視省標各營冬
季合操 十六日摺奏查閱通省營伍一律完竣附片奏閱視
省標各操又片奏記名提督吳占勝等請免騎射又片奏請將
武職蔬紅例馬免搭鈔票守兵月餉免扣搭錢朋銀 二十日
摺奏黔省交代依限結報附片奏請鑄給荔波營遊擊關防又
片奏已故四川候補府經歷李芳之妻徐氏節烈請旌又附奏
請注銷黎平府屯田舊案又摺奏節次勦匪出力人員開單請

獎附片奏前署貴州提督趙德光專祠請列入祀典

辛光緒七年公五十三歲

正月十九日具奏革除苗疆積弊一摺奏稱道員羅應旄條陳各件臣與司道悉心籌議除已革之弊勿庸再議外其一土司現飭不准凌虐苗民包攬錢糧擅理詞訟違者革黜停襲其一屯衛現飭屯糧歸地方官上納屯軍歸武營管轄其一苦缺現議古州等廳官吏苛苦酌給經費役食其一義學現飭清查公產多設苗寨義學勸喻改裝雜髮送子讀書酌請月給學額附片奏挑撥苗弁統歸貴東道考拔閱操 二月十五日摺奏提臣張文德傷發出缺請

尚放以重職守所遺篆務暫委何秀林護理奉

上諭貴州提督著羅孝連補授鎮遠鎮總兵著和耀曾補授欽此

附片奏黔省秋糧分別酌量折徵予限十年再復部章又附奏對調同知佐雜各缺候部覈復 二十五日具奏移設縣治並改移同知州判擬請分撥官兵駐劄以資控制一摺附片奏請頒羅斛同知等關防又摺奏道員吳自發請補貴東道 二十八日專摺奏謝年終

恩賞又摺奏黔省光緒三四五等年分各屬短徵關稅羨餘仍請蠲免 三月二十二日摺奏請補清江協副將各員缺又摺奏請補古州鎮中營遊擊各員缺附片奏收捐貢監銀兩封存由部

撥用又摺奏武職廉俸抵捐虛銜第一卹附片奏委道員吳自發備帑立辦理革除苗疆積弊事宜 四月初十日專弁齎奏

恭慰

大孝一摺 二十七日奉到初八日

上諭岑毓英著調補福建巡撫貴州巡撫著勒方鎬調補岑毓英著即赴新任勒方鎬候岑毓英到後再行赴任均著毋庸來京請訓勒方鎬未到任以前貴州巡撫著林肇元護理欽此又奉

上諭本日已有旨將岑毓英調補福建巡撫勒方鎬調補貴州巡撫並令岑毓英即赴新任矣臺灣爲南洋門戶防務緊要日本前議琉球一案未允所請該使臣悻悻而去難保不藉端生衅自應思

患預防嚴行戒備岑毓英久懸戎行諳習兵事卽著責成該撫將臺灣防務悉心規畫與何璟會商布政務期有備無患其閩山撫番未盡事宜亦當體察情形次第經理以爲久遠之計該撫當隨時前往該郡履勘巡閱實事求是認真整頓用副委任遇有緊要事件卽由該撫親往督辦至福建沿海防務並著該督撫妥籌辦理毋稍疏懈將此由四百里諭令知之欽此 五月初六日具奏

整頓通省學校請

敕部立案一摺奏稱黔省各屬紳士呈請培植學校臣分飭各地方官修葺文廟書院添設民苗義學動用地方原有公款無者由鹽經費內酌撥均大致就緒其省城貴山正本學古三書院則

增設舉人膏火二十分每月兩課需銀八十兩每年三書院共需銀六千一百零二兩三錢遇閏月加銀七十八兩遇鄉試年加膏火八十分需銀三百九十六兩由鹽經費內開支立爲定章其安順思南松桃平遠威寧畢節龍泉等府廳州縣公款旣微復無撥項不能不籌款生息臣與司道會商亦由鹽經費內提發安順書院銀四千兩思南書院銀一千兩平遠書院銀二千兩龍泉書院銀一千兩四川督臣丁寶楨自捐思南書院銀二千兩建昌道唐炯自捐松桃廳書院銀一千兩督臣劉長佑暨臣與藩司林肇元署臬司張煦貴西道曾紀鳳總兵蔡標任仕斌大定府知府程榮壽其捐銀一千兩發交威寧書院又由

臣捐銀一千兩合之道員會紀鳳知府楊熙瑞知縣陳昌言等共捐銀一千二百兩發交畢節書院以上各項皆派紳輪管發商生息爲書院義學束脩膏火所慮久而廢弛仰懇

敕部立案

又附奏興修大定府等處文廟立案又附奏遵義縣烏江

河擬籌建鐵鎖橋 烏江河界修文遵義兩縣境水深流駛濟以竹筏地故衝要郵遞行旅日有往來動多漂溺公以巡閱營伍過而太息擬仿滇之金沙瀾滄造鐵鎖橋捐廉五千金爲倡時川督丁公寶楨建昌道唐公炯捐助一萬五千金滇黔官紳醴輸又得一萬五千餘金公先相度河岸得基於安皋至是遂疏請興造設局製料派員督工役未竣而公移撫閩疆請託新

撫林公肇元竟其功於甲申歲落成橋長十八丈廣一丈五尺
安設守戶置田歲修 同日專摺奏謝

天恩調補閩撫又摺奏酌帶官兵赴閩籌辦海防附片奏赴閩路程
又片奏調道員李鳳書等赴閩差遣又片奏委糧道松長等署
藩司各缺又摺奏新授提督羅孝連請暫緩

陛見附片奏春操完竣又片奏委林從太等署威甯各鎮又摺奏威
甯州被淹田畝請豁免錢糧又摺奏懇請獲會匪逆首朱洪祚正
法 初十日具摺奏黔省歷年軍需支各款按季造報懇請
敕部核銷附片奏司道兩庫年久款項遺存細款報銷 十三日專

摺奏報交卸起程日期附片奏將在鑄造炸礮八位運往

建 時恭選

單恩請封三代及本身妻室皆封光祿大夫一品夫人十四日領

誥命四軸 是日公交卸巡撫關防 十七日自黔起程由古州取

道廣西 六月至桂林時苦旱公禱於堯山壽佛寺甘霖立沛

乃捐五百金爲葺寺費尋過廣東航海赴閩 是月公三子春

澤請假出都省視值於桂林偕五子春冀隨侍而行 七月初

五日抵福州初六日接受福建巡撫關防 初七日專摺奏抵

閩接印叩謝

天恩 二十四日會同將軍穆圖善公總督何公璟具奏商辦臺灣

防務大概情形一招附片奏請將臺灣綠營事宜由巡撫咨商

總督辦理 閏七月初四日摺奏光澤等縣猝遭水患查辦情形附片奏省城猝被颶風又片奏請將岑春澤留在任所請書
十三日摺奏閩省光緒二三年水災賑撫收支銀米數目附
片奏渡臺查勘海防 是日公出省坐輪船至馬尾阻風三日
閱視船廠船政大臣黎兆棠見公 十七日駛輪東渡十八日
黎明抵基隆登陸而行順道查勘滬尾鹿港各口 八月初七
日抵臺灣府城 初十日具奏匯解各款京餉起程日期一摺
附片奏渡海至臺灣各日期 十四五日往勘鳳山旂後安平
各口 十六日還臺北 二十四日公七子春蔭生 二十七
日抵基隆 二十九日附片奏六月間臺地颶風大雨又奏現

抵基隆將還閩省 次日內渡 九月初三日還福州署 初十日摺奏第十四次茶葉洋藥捐餉請獎附片奏籌解豫省河工銀一萬兩 二十五日具奏成造金州水師戰船工料銀數一摺 二十六日會摺奏籌商全臺防務一摺奏稱規畫臺防當以省刑薄歛固結民心爲先務而分路屯兵嚴守陸地次之添築礮壘保守海口礮臺又次之三者俱宜相輔而行不可偏廢臣毓英隨時前往督率文武實力辦理附片奏請以琛航永保兩輪船輪流渡臺又片奏請頒臺灣天后廟匾額又片奏稱彰化新竹兩縣之大甲溪寬六百二十餘丈歲值夏秋盛漲沙石並下舟杠難施每溺行旅兼滯文報臣查勘此溪離海不遠

疏鑿較易如挑溪中亂石盛以竹籠鐵柵築爲兩隄左右相交
形如八字收束溪水中流趨海卽可安設渡船往來無患隄身
寬以四丈雜種竹木自資堅久詢諸紳士僉以爲然現提海防
經費委辦物料 仲冬渡臺順便督視開築需用夫役助以防
軍俾早蒞事 是月公第六支生字新甯劉氏壻名永澳 十
月初六日摺奏于山王靈官神靈顯應請

湯封號附奏臬司張夢元委署藩篆 十三日附片奏提出省城義
穀賑濟澎湖饑民 十一月初四日具奏臺澎各營裁兵餘米
變價留作臺防經費一摺附片奏再行渡臺 初八日摺奏第
十五次茶葉洋藥捐銀請獎附片奏潮州鎮總兵方耀捐賑請

予其母建坊 是日公出省乘輪渡臺阻風五日十四日抵基隆登陸 十七日至艋舺 二十二日至大甲溪督視興工

十二月十八日摺奏七年分抽查保甲附奏籌辦開山撫番事宜 二十日具奏遵汰冗員擬將捐納勞績人員考試分別裁留一摺附片奏賑濟嘉彰兩屬災民又附奏請頒宜蘭縣城隍匾額又摺奏宜蘭縣節婦林莊氏等請旌附片奏沈徐氏節烈請旌 二十一日具摺奏循例密陳年終考語

壬午光緒八年公五十四歲

正月初四日公自大甲溪還臺北府督同官紳布置修築府城添築礮臺營礮 二十六日附片奏嘉義縣土匪莊芋等滋事

已飭文武帶兵查辦臣於日內親往督同辦理 二月初四五
日官軍攻破嘉義縣土寇所據大湖等處營寨餘寇潰散寇酋
逃逸 初七日公至嘉義縣督令購弋寇酋 二十二日摺奏
第十六次茶葉洋藥捐餉請獎又代奏新授雲南開化鎮總兵
蔡標謝

恩並請

旨陛見附片奏蔡標所統黔軍飭令帶同歸伍 三月初六日摺奏
上半年稅釐收支數目又摺奏七年分徵完新舊錢糧數目又
摺奏提解各款京餉委員起解日期附片奏嘉義縣土匪莊芋
等業經勦辦潰散懸賞購拏並陳明大甲溪隄開築完竣分開

北中二路以通後山均已分投修路紮營前進臣定於日內
渡還省 初十日公由基隆內渡十一日還福州署 十六日
專摺奏籌撥

陵工經費及茶稅京邊各餉委員起解日期又摺奏再請暫停分發
二年附片奏由臺還省辦理秋審 二十四日具摺奏參羅源
縣營縣教官互相稟許一併革職審辦附片奏籌解西征協餉
銀四萬兩又附奏籌解黔餉銀二萬兩又附奏藩司沈保靖
到任又附片奏糧道葉永元進京引

見 四月十二日摺奏挈獲重罪匪犯請仍就地嚴辦附片奏汀州
府雹灾查勘賑恤又附奏籌解八年分第二次協甘餉銀又片

奏舉司張夢元進京

陸見 是日公子春澤春莫遣廣西鄉試公在黔撫任整頓學校奉旨吏部議敘部議給予尋常加二級紀錄一次是月准黔撫咨達公子春榮請假至閩省視尋命回京供職五月初一日專摺奏謝加級

恩 初七日奉

上諭劉長佑著來京陸見雲貴總督著岑毓英署理張兆棟著署理福建巡撫未到任以前著何璟兼署欽此 二十二日摺奏第十七次岑葉洋藥捐餉請獎又摺奏提撥各款京餉委員起解日期附片奏應撤一半黔軍已經起程 二十四日專摺奏恭謝

天恩籲懇

陛見奉

旨著仍遵前旨迅速交卸起程將一切防務妥爲經理毋庸來京陛見欽此 同日會同總督學政具奏前任雲南巡撫林鴻年主講

正誼書院德行純深士民翕服懇

恩獎附片奏調閩黔軍全數撤歸原伍又片奏調閩差遣各員飭回原省 二十九日會摺奏臺灣報銷一摺又奏商人樂輸銀兩留作會試卷金恤養經費附片奏修理大甲溪及基隆營棚報銷又附奏在臺瘴故遊擊牛世清等分別請卹又片奏番目陳輝煌隨同開山撫番著有勞績請從寬免罪又附奏更正各

衙門公費又附奏隨帶炸礮八位留閩備用 六月初一日具摺奏報交御赴滇日期 是日交御巡撫關防 十二日自閩乘輪船起行 十六日至廣州易舟泝流而上 七月初一日至桂林 初四日公爲文祭家廟遵慈諭追正賴夫人爲繼配旋兼程赴黔 八月初一日抵貴陽小住二日 初四日專摺奏報入黔日期附片密陳俟到任妥籌防務又片奏由閩撤回黔軍帶赴滇防 是日自貴陽啟行赴滇 二十一日抵雲南省城 公於滇有再造功滇人感公如父母公亦視滇如其家倉卒奉諱而去善後事多未及爲問閩引領望公復來彌此缺陷及聞奉

命督滇道路額麻官紳軍民有越境爭逐者與次近郊香花夾道公
下與周勞藹然如家人父子之親 二十二日接受總督關防
二十四日具摺奏報抵滇接印日期 九月十三日會同巡
撫杜公瑞聯馳奏遵

首飭令藩司唐炯妥辦邊防以專責成並陳明新軍次第調齊舊軍
陸續裁換各情附片奏主事唐景崧尙未到滇未便派令出關
二十五日附片奏開化鎮總兵蔡標飭赴本任 十月十一
日會摺馳奏唐炯查看邊防回省面商分兵換防情形附片奏
唐炯密稟越南情形又附奏委同夷各紳分辦保甲 二十六
日會摺奏據詳裁革夫馬籌款支銷以蘇民困附片奏記名提

督吳永安留帶防軍又附奏叅將張永清等留滇差遣又附奏
懲辦土匪趙潰新又摺奏揀員請補副將各缺附片奏記名提
督劉興等二十七員遇有雲貴缺出酌量補署又附奏滇省有
臣親誼陳明應否迴避又附奏瘴故總兵張繼聲等八員請卹
十一月初二日具摺奏遵

旨復陳雲南報銷一案附片奏整頓營伍又片奏委何秀林等署昭
通鎮各缺又附奏委總兵丁槐統帶黔軍駐紮省城 十二月
初九至十四等日公親臨校場閱視省標官兵及練軍冬操
十八日會摺奏校閱省標各營冬操情形

岑襄勤公年譜卷七

癸未光緒九年公五十五歲

正月初二日奉到

上諭總理各國事務衙門奏法越交涉一事法人現欲與中國會商請飭豫籌善法一摺亟須滇粵各省先事妥籌以備臨時會議著將應行籌畫各節查照該衙門前函詳慎妥議如何有利無害堪以行之久遠迅速奏明並知照該衙門以憑覈辦等因欽此 初九日會奏遵議覆陳一摺奏稱疆界可分而北圻斷不可割通商可許而廠利斷不容分土匪可墜而劉永福斷不宜逐宜堅持定見示以限制方可行之久遠又奏防邊官軍瘴故員弁開

單請卹附片奏由閩撤回在途療故遊擊黃正等十八員請卹
附奏查明陣亡千總潘文興等保案請准承襲 二月十六日
會摺奏遵

旨查明各案出力員弁紳團開單請獎附片奏開復記名提督李應
舉等四員原官又片奏開復阿迷州知州光進德等二員處分
又摺奏記名總兵丁槐等請補副將各缺附片奏開復總兵楊
聯桂原官原銜 二十二日奉到

上諭岑毓英杜瑞聯奏遵議覆陳一摺據稱法使有此調停之舉宜
堅持定見不致貽害將來方可行之久遠疆界可分而北圻斷不
可割通商可許而廠利斷不容分土匪可驅而劉永福斷不宜逐

洵爲扼要之論深合機宜近聞法國欲更前議並欲將該使寶海
撤回彼族反覆無常惟當持以鎮靜嚴中做備著岑毓英杜瑞聯
祝文蔚督飭關外各營擇要扼守妥籌防範固不宜深入越境必
不可稍有退紮以期固邊疆而維大局欽此 是日公次子春煦
生子德崇 浪穹縣長營有法國教堂司鐸張若望淫暴擾民
衆心怨憤於是月十九日殺若望焚教堂教民男女死者九人
是月法人陷越南南定省 三月初四日會摺奏參浪穹縣
知縣沈弁均暫行革職遴委鹽法道鍾念祖馳往查辦 十二
日摺奏納樓土司絕嗣擇其親支改爲土舍分管地方 十七
日會摺馳奏據報越南國南定省失守情形 二十七日奉到

上諭總理各國事務衙門奏越南事宜現有變局亟應密籌防務一
州現聞法兵已破越之南定並議將寶海撤回事已中變情殊巨
測在我保護屬邦固守邊界均關緊要亟應妥籌備豫著岑毓英
倪文蔚杜瑞聯督飭關外防軍挑選勁旅扼要進紮鮮端不可自
我而開要必壯我聲威用資鎮懾並期實堪備禦進止足恃以杜
詭謀而維大局等因欽此 四月初二日會摺馳奏覆陳密籌防
務布置情形附片奏派撥滇軍於山西興化擇險扼守又片奏
張松林委署騰越鎮總兵 初五日奉到

上諭前諭徐延旭出關現在諒已前往滇省邊防亦應酌派大員帶
兵駐紮著岑毓英杜瑞聯飭令唐炯迅速出省統率防軍擇要扼

守等因欽此 初十日會摺馳奏遵

旨飭令藩司唐炯於十五日出省防邊附片奏駐越防軍俟查看添
派又會奏查明滇省軍需善後章程兵數管制支發欸目造冊
送部立案一摺又奏附給各屬津貼公費一摺附片奏東昭江
防東路巡防需用經費奏咨立案 二十二日會摺馳奏道員
鍾念祖查明粵民教仇殺起衅緣由獲犯提省審辦情形
是月十二日劉永福大敗法人於越之懷德府紙橋 二十五
日唐公炯行抵蒙自新安所駐營 五月十一日會摺馳奏越
南官軍進攻河內連獲勝仗附片奏鍾念祖查解教案人犯到
省交訊又片奏擊獲官匪郭應培等三名正法又片奏廣南團

首王澤寬懇准效力贖罪 六月初二日奉到

上諭容毓英著補授雲貴總督欽此 初六日專摺恭謝

天恩額懇入

毅又代表新授普洱鎮總兵何秀林謝

恩並請

旨陛見 初七日會摺馳奏審明浪穹民教滋事各犯分別定擬附

片奏酌給銀兩交法國主教古若望自行經理修堂撫恤又片

奏委馬忠署普洱鎮總兵 十九日會摺馳奏添募勇營扼紮

越南要隘並招安降人韋二等編營助防又摺奏楊建煥請補

督標中軍副將附片奏貴州藩司沈應奎稟報查辦司庫情形

又片奏參將馬中級請歸宗復姓更名 七月十三日具摺奏
遵

旨查明貴州藩庫存款據實覆陳附片奏黔省餉絀民貧情形又片
奏越南近日軍情又片奏參將李茂等請免騎射 是月巡撫
杜公瑞聯因雲南報銷案部議降調唐公炯奉

旨補授雲南巡撫 二十三日會摺奏揀員請補東川普洱等府缺
附片奏設續修雲南省志局以徵文獻設敬節堂以恤孤嫠
二十五日准部咨查辦雲南報銷案六月二十二日奉

上諭岑毓英著降一級留任准其抵銷欽此 八月初一日奉到
上諭雲南素產五金乃天地自然之利該省銅政久經廢弛本應整

頓規復以資鼓鑄而利民用此外金銀鉛鐵各礦亦復不少均爲外人覬覦自宜早籌開採以廣中土之利源卽以杜他族之窺伺實爲裕國籌邊至計惟經費較鉅籌款維艱近來各處開採煤礦皆係招商集股舉辦較易若仿照辦理廣招各省股實商民按股出資與官本相輔而行則衆擎易舉事乃克成前據岑毓英奏整頓銅務章程五條業經戶部議覆准行昨據署左副都御史張佩綸奏稱招商集股開採滇礦爲富強本計不爲無見岑毓英唐炯身膺疆寄於滇省礦務必能留意講求實心經畫著卽詳細會商妥速籌辦總期事在必行毋得視爲不急之務日久辦無成效坐失事機至各處礦苗應如何先行相度或仍應購買外洋機器以

利開採均著豫爲籌議一俟款項集有成數卽可剋期興辦不至
遲誤等因欽此 是日會摺奏查明各案出力人員勞績分別開
單請獎附片奏越南軍情並探聞越南國王阮福時病故繼嗣
未立 十二日准部咨撫閩任內解餉議敘七月初四日奉
上諭岑毓英著加一級欽此 十三日驛奏越南劉團營墨因隄決
移紮一摺又摺奏密派道府馳往貴州查訪撫藩被參各款
二十八日專摺奏加級抵銷恭謝

天恩會摺馳奏密籌越南防務仍照前議聯絡對團以顧全局又摺
奏揀員請補雜西協副將等缺附片奏貴州學政孫宗錫林國
柱被參各款密飭赴黔道府併查 九月初五日奉到八月十

四口

上諭法越議兵一事法人自攻占順化河岸礮臺後迫脅越南議約
十三條該國情形岌岌可危邊事孔亟防務尤形喫緊近聞越南
黑旗各營復經擄仗獲勝滇粵防軍皆須嚴密布置聯絡聲勢不
可稍涉鬆勁等因欽此 十九日會摺馳奏探聞法越議和現無
戰事劉團仍扼守山西情形又奏滇省度支匱乏請

收催各省協餉 十月初四日奉到九月十五日

上諭法人脅越議約盡攘該國權利果如所議越南無以圖存大局
所關甚重法使脫利古來京在總理各國事務衙門並未提及此
事意殊巨測劉永福一軍屢獲勝仗當不因該國議和稍形退沮

規畫進規河內如能剋期攻克以固北圻門戶辦理自易得手前
旨欽此倪文蔚等令唐景崧設法激勵著該撫等密速妥籌徐延
旭著慎遵前旨星速出關相機調度所有滇粵防軍岑毓英倪文
蔚徐延旭唐炯務當督飭將領嚴密布置俾壯聲援勿稍鬆勁糧
餉軍火必須力籌接濟朝廷惟恐該兩省饑需不繼致失事機諭
令戶部籌撥有著之款茲據該部奏稱已撥湖北應解京餉銀十
五萬兩解廣西應用四川應解京餉銀九萬兩湖南應解京餉銀
六萬兩解雲南應用此外另由江西撥銀五萬兩湖北撥銀五萬
兩解交廣西四川撥銀四萬兩湖南撥銀六萬兩解交雲南等語已
諭令各該督撫分別迅速接解本年京餉屢有截留部庫益形支

緝茲因邊情緊要特予添撥該督撫等務當深體時艱極力籌辦
俾越事及早挽回以維大局將此由六百里各密諭知之欽此

初九日專摺馳奏密籌恢復越南事宜擬統兵出關駐紮山西
調辦恭候

命下剋日啟行並陳明撫臣唐炯定於月之十四日出省回新安所

防營照料 初十日奉到九月二十日

上諭岑毓英唐炯奏密籌越南邊防倪文蔚奏探報邊情防務愈棘
各一招法人暫越議約果如所議越已無以立國大局所關甚重
獨以劉永福一軍屢次獲勝進規河內如能剋期攻拔辦理得手
則越事尙可挽回乃滇軍遽行退紮以致劉團解體有回駐保勝

之議被廢將益思被遲邊事尚可問耶岑毓英唐炯調度乖方貽
誤大局著傳旨嚴行申飭卽著懷遵前旨督飭防軍扼要進紮嚴
密布置倘仍怠緩從事定將該督撫治罪唐炯著星速出省馳赴
防所徐延旭諒已出關法人現由丹鳳攻撲山西黑旗各營恐難
抵禦岑毓英倪文蔚徐延旭唐炯務當飭令各軍嚴申做備聯絡
聲勢相機援應不得稍涉疏虞將此由六百里各密諭知之欽此

十九日會摺馳奏越南劉團退守山西情形並添兵出關駐
紮備援附片奏河內法守甚固礙難攻堅又片奏籌軍六營改
爲澳軍所遺名糧由給另補又摺奏永昌府知府以劉毓珂調
補附片奏請

全書卷十
一
敕催新授雲南藩司龔易圖赴任又片奏委員赴上海香港購辦洋

槍 二十一日奉到九月三十日

上諭法人既與越南立約必將以驅逐劉團爲名專力於北圻滇粵
門戶豈可任令侵偏現經總理各國事務衙門照會法使告以越
南久列藩封歷經中國用兵勦匪力爲保護天下各國所共知今
乃侵凌無已豈能受此蔑視倘竟侵及我軍駐紮之地惟有開仗
不能坐視等語如此後法人仍欲遣兵於北圻則我之用兵固屬
名正言順劉團素稱奮勇現在退紮山西連河內稍遠著徐延旭
飭令劉永福整軍進紮相機規復河內省城不可稍有遲沮北甯
爲我軍駐防之所如果法人前來攻偏卽著督飭官軍竭力捍禦

毋稍鬆勁岑毓英等前奏滇軍駐紮山西輪船礮彈可及城中固守不易惟該城與北甯相距較近必應固守以成犄角之勢滇省防營無多難資策應著岑毓英唐炯添募數營以厚兵力等因欽此 十一月初二日會摺馳奏越南山西近日情形並添募勇營以厚兵力又摺奏查明貴州撫臣暨藩司各員被參各款據實覆陳又摺奏查明貴州學政被參各款據實覆陳 十五日馳摺奏探報越南山西近日防守情形 十九日奉到十月二十九日

上諭岑毓英奏遵籌越南事宜擬由該督統兵出關籌辦請旨遵行一摺岑毓英以越事現正喫緊擬挑帶所部二十營親赴前敵相

機調度實屬勇於任事該督威望素著馳赴防所鎮撫其間自可
振軍威而維大局著照所請剋日帶兵出關前往山西擇要駐紮
前由總理各國事務衙門照會法使如法人侵及我軍駐紮之地
不能坐視目前事勢總以保守北圻力固滇粵門戶爲最要該督
所奏令兩將劉永福黃佐炎等分道進取大軍駐紮山西仍步步
謹慎不稍輕率所籌均合機宜卽著隨時妥籌調度與粵西防軍
聯絡聲勢嚴密布置力杜彼族狡謀唐炯卽著回省所有籌濟餉
需及吏治厥務各事宜著責成該撫實力經理毋稍疏懈本日據
內閣學士周德潤奏請飭各省保薦將才一摺國家整軍經武本
以儲將才爲要義茲經諭令各直省督撫保薦值茲防務方殷需

才尤亟著該督撫等加意延訪果有曉暢兵機深明韜略及熟諳邊務練習海防者卽行據實保奏以備任使將此由六百里諭令知之欽此 二十五日馳摺奏遵

旨帶兵出關恭報起程日期附片奏道員李鳳書等帶往關外差遣又片奏調記名提督鄒復勝赴越南遣用又片奏所帶出關勇營月需餉銀五萬餘兩又摺奏滇省署事武員擬照文員半支廉俸銀兩 是日公自省城禡牙啟行 十二月初一日次通海接探報法人攻越南山西省於上月十七日失守 十一日抵越南保勝與唐公炯會商機宜唐公旋於十四日回省籌辦餉械 十五日會摺馳奏行抵越南保勝聞山西失守會商防

堵布置情形附奏請由津滬兩局再撥洋槍逼碼三百萬顆又
附奏委馬忠查辦車里宣尉司爭襲一案 十九日奉到十一
月二十二日

上諭現據張樹聲電報順化海口久爲法踞陸出欽州路僻難行擬
仍由龍州出關前赴越都等語師行以速爲主若道里遼遠轉餉
難滯於越事緩不濟急且據曾紀澤電報法人現又添兵以鎮越
亂則大兵前進尤宜取道便捷迅赴事機本日已諭令張樹聲毋
庸赴越著改派岑毓英前往越南宣布威德削平禍亂並令該國
擇賢繼位奏請冊封至該督統兵赴越應由何路前往卽著隨時
相機務期穩慎倘一時驟難進發仍著與粵軍聯絡策應堅守山

西北甯等處以固邊疆門戶欽此 二十日具奏循例密陳年終

考語一摺學政關防一片 二十三日奉到十一月二十八日

上諭前經疊次諭令岑毓英統兵出關業據該督奏報派撥各營先
期次第出省該督剋日起程馳赴防所昨聞法兵攻破越南山西
省城復諭令該督嚴密扼紮毋稍鬆懈現在事機緊急邊關安危
關繫甚重該督行抵何處著卽迅速前進將關外一切防務嚴密
布置妥籌備禦並著體察越南現在情形應如何相機辦理之處
迅速覆奏以慰廑系將此由六百里密諭知之欽此 二十四日

馳摺奏遵

旨籌畫防禦情形附奏奉

論迅速前進駐紮保勝待運軍裝 是月十四日公側室周氏病卒

甲光緒十年公五十六歲

正月初四日馳摺奏興化防守情形並拔赴前敵日期 初八

日公率親軍舟行赴興化留道員湯聘珍駐保勝陳席珍駐蒙
自轉運餉械 十五日公至家喻關關與化城三十里許

越南使相黃佐炎參知梁輝懿總督阮廷澗巡撫阮光碧黃相
協等先後來見公 二十日公至興化閱城外地營 二十
二日奉到九年十二月二十三日

上諭徐延旭奏法人攻燬越南山西省城現在嚴防北甯請飭廣東
等省合圖堵蕩各摺片現據岑毓英奏報已率所部二十營起程

十二月內可以齊抵防所著該督撫妥籌調度實力扼防激勵劉永福一軍速行整頓並著督飭各營與粵軍聯絡聲勢援應北甯該督撫等總當合謀併力保守完善之區以固邊境是爲至要等因欽此 二十六日馳摺奏報行抵興化家喻關等處布置防守

陳明北圻尙爲越有者惟北甯諒山興化宣光太原高平六省及山西省屬之臨洮端雄二府滇軍分守興化宣光及臨洮端雄餘歸粵軍分守仍聯絡呼應附片奏探聞越京內亂議約各情又片奏應辦題奏事件展限一月又片奏查辦貴州撫藩參案已結陳明已故藩司吳德溥在黔聲名平常新授糧儲道吳自發苗情信服 三十日探報法人進攻北甯 二月初一日

公派主事唐景松南將劉永福馳援北甯 初八日奉到正月

十八日

上諭岑毓英已抵保勝亟應親往興化一帶查勘布置邊外各軍心志未齊必當有所統攝以一事權所有徐延旭統帶各營及各路調防諸軍均著歸岑毓英節制調度徐延旭仍當和衷商辦不得稍存意見致誤戎機等因欽此 十三日馳奏懇辭節制粵楚各軍一摺又奏增募勇營請撥協餉附片奏陣亡員弁秦濬等請卹 十五日法人攻陷北甯 二十一日馳摺奏北甯失守情形附片奏南官黃佐炎等帶兵嚮導借用餉銀一千兩懇免繳還以示體恤又片奏遵籌周德潤陳奏越事二十一日太原失

守 二十九日馳摺奏太原繼失興化孤懸餉械未備擬全師
撤守邊境 三月初一日公赴絕旺家喻關等處閱視防營
十二三十四等日公飭興化官軍陸續退紮鎮安縣館司關
嶽毀興化城營飭宣光軍退守河陽 十八十九等日全軍退
至保勝分紮古林箐馬白關新街蒿枝地蠻耗窰頭新安所以
劉永福紮大灘 二十日馳奏官軍糧盡勢孤全軍退守邊境
裁併節餉情形又摺奏道員陳廷珍請補迪南道 四月初六
日奉到三月十二日

上諭岑毓英奏增募勇營請添協餉並懇免節制粵楚各軍各一招
前因北甯被陷邊事日棘疊經諭令岑毓英激勵各軍擇要扼守

旋聞太原又被法踞邊防更形喫緊茲覽該督所奏尙在北甯太原未失以前目下局勢迥不相同軍情瞬息萬變該督所擬添募各營自係力圖振作爲避堅攻瑕之計惟孤軍深入務策萬全法人詭詐百出越官黃佐炎阮輝琮等是否可信該督惟當穩慎進取不可稍涉大意滇軍增募日多需餉益亟著戶部速卽籌撥有著的款銀一百萬兩趕緊解交應用不得以空言搪塞關外各軍不可無所統攝該督所請免其節制越楚粵各軍之處著毋庸議廣西巡撫已有旨令潘鼎新署理俟該署撫到防後和衷商榷力固邊陲以維大局將此由六百里密諭知之欽此 初八日馳摺奏官軍撤回大灘保勝河陽等處布置防守仍懇辭節制之

命附片奏遣撤道員岑毓寶所部先行入關 初九日公子春莫奉

諭出桂林還滇署綜理家務 十六日奉到三月二十二日

上諭岑毓英奏北甯失陷興化等處布置防守並隨時激勵劉團暨
請賞給越南官軍餉銀各摺片覽奏均悉正在寄諭間接據李鴻
章會紀澤電報法犯興化華軍將城焚燬退走等語是否屬實著
岑毓英迅速詳細奏聞現在進止機宜著該督酌量兵力妥慎籌
辦總以力保邊疆門戶爲要不得疏懈等因欽此 二十一日馳

摺奏遵

旨詳細覆奏並陳明據險設防力保紅江上游附片奏請酌劑軍火
洋械附片奏提督周萬順等遣撤回川專摺奏謝年終

恩賞 是月唐公炯奉

旨褫職逮問張公凱萬代爲雲南巡撫 五月初一日奉到四月初

八日

上諭署都察院左副都御史張佩綸奏請飭邊海各軍嚴防備戰以杜要盟之計一摺滇粵邊境著張樹聲岑毓英潘鼎新督飭各營實力扼守毋稍鬆懈至所稱將來法人必索劉永福請飭李鴻章岑毓英顧全大局等語法人屢爲黑旗所敗其蓄志驅除自在意中著李鴻章岑毓英先事籌計以爲辯論地步等因欽此 初三

日馳摺奏稱雲南出關之路有二一由蒙自出保勝一由開化出河陽保勝據紅江上游對江過山卽十洲三猛地面現在

永福屯保勝文盤大灘黃守忠屯河陽宣光劉仁豫練中和等
屯三猛各隘四月內法人兩次竄入猛羅俱爲劉團擊卻擒斬
數十人臣部各營皆分紮關內外附近劉團以備策應至劉永
福爲越南提督守越南地方理直氣壯官軍自守邊境門戶亦
在情理之中均可與之辯論劉永福比來與越京聲息不通憂
形於色臣告以

天恩高厚必能委曲保全其心稍安若予以一官其部下頭目亦量
予位置將來邊徼海陲皆可隨地驅策附片奏由廣東代購外
洋火器 十三日奉到四月十五日

上諭雲南廣西官軍駐紮越南地方該處係煙瘴之鄉現交夏令軍

年譜卷一
士荷戈遠役往來於炎風暑雨深宮塵念宵旰懷著發去御製
平安丹各十匣交岑毓英潘鼎新傳旨分賞各營俾除瘴癘該督
撫並當盡心拊循用副體恤行聞至意將此由六百里各諭令知
之欽此 十四日奉到四月二十五日

上諭岑毓英奏官軍糧盡勢孤現已退守邊境並酌裁勇營一招覽
奏均悉越事萬難補救而我軍糧盡勢孤全師而返因與退縮者
有聞惟雖奏明並未奉旨究有應得之咎本日已明降諭旨將岑
毓英交部議處以示懲儆現在法國使臣已到天津與李鴻章講
解漸有成議惟條目尙未議定事變殊難預度越南地方未靖尤
易橫生枝節各路防軍斷不可因有可和之機稍形鬆懈仍著岑

毓英嚴督各營擇要駐紮認真操練以備不虞至進止機宜仍遵前旨候諭遵行所有裁併勇營著照所議辦理務須汰弱留強以資得力劉永福一軍前經打仗著績不無微勞此時該軍退紮大灘保勝一帶著該督妥爲拊循並詳察該軍現在勇數若干若何安置之處妥籌具奏聞法人有雇募廣東人爲兵勇者廣東有此恐雲南亦所不免著李毓英飭屬不動聲色設法禁止是爲至要將此由六百里密諭知之欽此 十六日專摺奏叩謝

天恩頒賞各營平安丹藥附片奏法人侵萊州劉團擊卻之 二十
二日馳摺奏滇軍汰弱留強現留七千五百人編爲二十營分
布防守劉永福祖籍廣東情殷內向會報捐游擊職銜二品封

典所部兩廣勇丁強壯可用將來如於廣東水陸各標

恩予

一缺調赴海防自必力圖報效附片奏瘴故副將王茂林等四

十八員請卹又片奏奉撥京餉一百萬兩仍請解京以重根本

又附奏道員陳廷珍委署迤南道糧道劉海鼇委管志書局

是月法人駛兵輪八艘攻宣光城黃守忠退紮離城六十里之

山竈 閏五月初三日奉到五月初八日

上諭周德潤奏滇粵官籌善後法人以保護中國邊境爲詞意欲借

爲既脫屯兵觀釁請於分界前先扼其要等語法越構衅現經李

鴻章與法商議有簡明條款雖據聲稱不入雲南然此後滇粵邊

境均應豫爲布置以峻防閑廣西廣東水陸各隘究以何處爲最

要雲南將來有邊外互市之事尤須扼定界限自固藩籬應如何
駐紮重鎮增備船礮訓練營伍全在該督撫相度地勢先事綢繆
著張樹聲張之洞岑毓英倪文蔚潘鼎新張凱嵩各就該省形勢
切實籌畫奏明辦理如有周德潤陳奏所未及者該督撫亦當各
抒所見竭力籌辦以臻周密等因欽此 十一日准部咨遵議處
分照例降二級留任不准抵銷奉

旨依議欽此 十三日馳摺奏邊關形勢並探聞敵情添兵防備附
片奏瘴故副將孫毓等四十六員請卹又摺奏叩謝降級留任
恩附片奏劉團餉銀按月撥給拏獲法兵二名已經瘴故 十七日
奉到五月二十五日

諭旨本日據李鴻章照錄潘鼎新電信法兵來至屯梅谷松以外桂軍防守嚴戒等語著岑毓英嚴飭各營仍紮原處不准稍退示弱亦不必先機接仗倘法兵竟來撲犯則鮮自彼開惟謹與之決戰力遏兇鋒並著岑毓英傳知劉永福伊既與法結仇越南亦無恩誼前已屢受中國接濟之恩此時自可率部來歸以定趨向劉永福如何答覆之處卽著迅速具奏該軍糧餉軍火仍著隨時接濟飭令扼險駐守欽此 二十一日馳奏遵

旨密陳籌辦情形一摺附片奏瘴故參將王森等十五員請卹

是月公移駢馬白關 六月初十日奉到閏五月二十四日照

旨將防營撤回關內之

旨同日又奉

諭旨法國巴使逗遛上海不卽來津議約並據各處電報孤拔有集兵船他駛占據中國地方爲質索賠兵費之說無理要求萬難遷就海江防務喫緊著沿海各省將軍督撫統兵大臣等密飭各軍嚴防以待一面廣爲偵探倘有法軍前來按兵不動我亦靜以待之如果撲犯我營或登岸肆擾務須併力迎擊並設法斷其接濟期於有戰必勝如退縮不前者立卽軍前正法等因欽此 十二

日馳奏奉

旨調兵入關現擬籌辦情形一摺又摺奏大理府知府鄧華熙調補

雲南府知府 是月奉

上諭雲南邊防緊要著丁寶楨於四川現有各營中酌撥五營交鮑
超統帶馳赴雲南擇要駐紮爲岑毓英後繼之師等因欽此 七
月初二日奉到六月十一日

上諭雲南防軍前有旨飭令撤回關內原係查照天津所議節明條
約辦理現在局勢未定防務仍屬緊要該督現已移軍馬白關卽
著扼紮嚴防認真訓練以期緩急足恃所謂各營到後亦在關內
擇地駐紮不准輕進劉永福一軍仍著接濟糧餉軍火糶糜勿絕
能否率衆來歸並遵照五月二十五日詢問諭旨迅速覆奏欽此

又奉

諭旨彭玉麐等派營援閩力顧大局殊堪嘉尙現在擬議未定法情

巨測萬一決裂必宜出奇制勝潘鼎新岑毓英務將現駐關內各軍切實訓練應候調遣彼此聯絡聲勢庶足迅赴事機率制敵勢等因欽此 初三日接潘公鼎新函稱法破難籠礮臺陷而未據

法船駛赴閩省

初八日馳奏訓練各軍聽候調遣並函商廣

西撫

臣預籌聯絡一摺附片奏懇准帶兵赴吳淞口駐防又摺

奏參將覃修綱被訐各款查無實據請免置議附片奏瘴故提舉賀起濤等十七員請卹 初九日奉到六月二十七日

諭旨人狡橫無理已甚現惟一意主戰著岑毓英飭令劉永福先行進兵迭圖規復北圻岑毓英潘鼎新關內各軍陸續進發不日即當明發諭旨宣示並將劉永福錄用等因欽此 初十日公派

劉永福張世榮等相機前進又派軍修網帶勇三千繼之 十
二日公率親軍赴保勝途次患病至古林箐暫駐 十六日奉
到六月二十三日

諭張凱嵩奏擬籌滇省邊防大略情形一摺前據周德潤奏滇粵
宜籌善後當諭令岑毓英等切實籌畫奏明辦理茲據張凱嵩先
籌大略情形具奏滇省善後事宜將來如果互市通商以相度地
勢嚴防邊隘爲最要張凱嵩所陳擬辦屯田建設礮卡練習刀矛
各節著岑毓英會同張凱嵩妥籌辦理其移鎮以重責成一節陳
元鎮總兵移紫蒙自是否實有裨益並著岑毓英詳加酌度妥議
具奏欽此 二十日奉到初六日

上諭張之洞電稱牽敵以圖越爲上策現令唐景崧募勇出關與劉永福合力犄角趕籌餉項軍火接濟所辦甚是前有旨令雲桂兩軍進發岑毓英潘鼎新務卽督率所部星馳前進相機籌辦俟各軍齊抵前敵迅速奏聞等因欽此 二十四日馳摺奏遵

旨進兵牽制敵勢擬移駐保勝督飭各軍協同劉團進發附奏敬陳管見一片 八月初一日奉到七月初六日

上諭越南爲我大清封貢之國二百餘年載在典冊中外咸知法人狡焉思逞肆其鯨吞先據南圻各省旋又進據河內等處戕其民人利其土地奪其賦稅越南君臣閭閻苟安私與立約並未奏聞法固無理越亦與有罪焉是以姑予包涵不加詰問光緒八年冬

開法使寶海在天津與李鴻章議約三條正飭總理各國事務衙門會商妥籌法又撤使翻議我存寬大彼益驕貪越之山西北甯等省爲我軍駐紮之地請查越匪保護屬藩與法國絕不相涉本年二月開法兵竟來撲犯防營當經降旨宣示正擬派兵進取力爲鎮撫忽據該國總兵福祿諾先向中國議和其時該國因埃及之事岌岌可危中國明知其勢處迫蹙本可峻詞拒絕而仍示以大度許其行成特命李鴻章與議簡明條約五款互相畫押諒山保勝等軍照議於定約三月後調回並經諭飭各該防軍扼紮原處不准輕動生衅帶兵各官奉令維謹乃該國不遵定約忽於閏五月初一初二等日以巡邊爲名在諒山地方直接防營先行開

歐擊我軍始與接仗互有殺傷法人違背條約無端開衅傷我
官兵本應以干戈從事因念訂約和好二十餘年亦不必因此盡
棄前盟仍准總理各國事務衙門與在京法使往返照會情喻理
曉至再至三閱五月二十四日復明降諭旨照約撤兵昭示大信
所以保全和局者實已仁至義盡如果法人稍知禮義自當翻然
改悔乃竟始終怙過飾詞狡賴橫索無名兵費恣意要求輒於六
月十五日占據臺北基隆山礮臺經劉銘傳迎勦獲勝立即擊退
本月初三日何璟等甫接法領事照會開戰而法兵已在馬尾先
期攻擊傷壞兵商各船轟燬船廠雖經官兵焚燬法船二隻擊壞
雷船一隻並陣斃法國兵官尙未大加懲創該國專行詭計反覆

無常先啟兵端若再曲予含容何以伸公論而順人心用特揭其無理情節布告天下俾曉然於法人有意廢約衅自彼開各路統兵大臣暨各該督撫整軍經武備禦有年沿海各口如有法國兵輪駛入著卽督率防軍合力攻擊悉數驅除其陸路各軍有應行進兵之處亦卽迅速前進劉永福雖抱忠懷而越南昧於知人未加拔擢該員本係中國之人卽可收爲我用著以提督記名簡放並賞戴花翎統率所部出奇制勝將法人侵占越南各城悉圖恢復凡我將士奮勇立功者破格施恩並頒內帑獎賞退縮貽誤者立即軍前正法朝廷於此事審慎權衡總因動衆興師難免震驚百姓故不輕於一發此次法人背約失信衆怒難平不得已而用

兵各省團練衆志成城定能同仇敵愾並著各該督撫督率戰守
共建殊勲同膺懋賞此事係法人偷盟肇衅至此外通商各國與
中國訂約已久毫無嫌隙斷不可因法人之事有傷和好著沿海
各督撫嚴飭地方官及各營統領將各國商民一律保護卽法國
官商教民有願留內地安分守業者亦當一律保衛倘有干預軍
事等情一經察出卽照公例懲治各該督撫卽曉諭軍民人等知
悉倘有藉端滋擾情事則是故違詔旨妄生事端我忠義兵民必
不出此此等匪徒卽著嚴拏正法毋稍寬貸用示朝廷保全大局
至意將此通諭知之欽此 初四日奉到七月十七日

諭旨李鴻章電稱潘鼎新來電越境瘴潦正威守易攻難卒毓英函

中須俟秋後瘴滅乃可進等語雲粵各軍既難前進劉永福所部
久居該國能耐煙瘴著傳知該提督趕緊督軍進取岑毓英撥給
餉需軍火務使足用迅赴戎機雲粵各營與該軍聯絡策應用壯
聲援現已秋高瘴滅迅速進發不得藉詞遷延致干重咎等因欽
此 初七日馳摺奏遵

旨飭催進兵擬卽親赴文盤州督飭迅國進取附片奏廣東代購軍
火價銀請由該省撥發又片奏瘴故知縣雷金澤等六員請卹
又片奏調降調道員唐啟蔭出關差遣 是日公乘小船赴文
盤州劉永福軍營 初十日督催請軍進發 十三日法人嬰
節司關堡壘退守宣光劉永福進軍規取 十五日奉到七月

二十二日

諭旨前令廣西至雲南安設電線現在雲粵督撫已否辦理能否由
龍州徑至馬白關著張之洞轉電潘鼎新逃谷岑毓英立即商辦
以速軍報等因欽此 二十二日奉到初一日

上諭岑毓英奏遵旨訓練各軍聽候調遣並請准帶所部馳赴吳淞
口各摺片覽奏均悉前疊諭岑毓英督師出關規復北圻各城茲
據該督所奏尚未接奉前旨現值秋高氣爽即著督飭劉永福及
在防各營力圖進取逃赴戎機岑毓英以內地防務重於邊關請
率所部馳赴吳淞口察看敵勢或南或北相機策應具見惻忱沿
海各省防務已疊諭該大臣將軍督撫嚴密布置岑毓英素性勇

往惟當懷遵前旨速赴越南盡力攻取以副委任所請著毋庸議
等因欽此 九月初二日馳摺奏督催劉永福各營前進法人毀
館司關退守宣光又代奏記名提督劉永福叩謝

天恩並請獎卹所部出力陣亡員弁附片奏越南政苛賦重民心
離散難以收爲我用又片奏差遣道員湯聘珍請

旨錄用又片奏雲桂接設電線已商由廣西撫臣酌核會辦又片奏
探聞越南新立嗣王阮膺登爲法人威逼自盡又片奏瘴故知
州郭拉豐阿等九員請卹 初五日奉到八月十六日

諭旨昨據李鴻章電稱閩口法船大隊南行今復有基隆失守之信
法人兇狡惟有攻其必救直通西貢無使分兵西援臺灣乃

可稍鬆前諭令岑毓英潘鼎新合力進兵著卽迅速前進並激勵
劉永福率軍進勦先攻克太原北甯各城越南義民如有可爲內應
務當設法聯絡內外夾攻使法人無可駐足自可直達南圻以期
牽制欽此又奉二十日

諭旨岑毓英電稱飭令劉永福進兵有藉詞求緩之語現在進規北
圻全在用人得宜著岑毓英激勵該提督奮勉立功並妥爲籠絡
務令感恩畏威毫無猜疑倘駕馭失宜惟該督是問前令酌保黃
守忠等並飭速行奏請候旨施恩等因欽此 二十四日馳摺奏

遵

旨迅速進兵已偏圍宣光擬添募兵勇分道深入懇撥給月餉附片

奏記名提督楊國發病痊調營差遣 十七十八兩日法人援
宣光劉永福擊敗之頗有斬擒四面偏攻法人嬰城面守 二
十六日喇塔奏圍攻宣光截斷法援頗有斬擒現又添兵助勦
附片奏鶴麗鎮總兵朱洪章願募五營出關隨征所遺鎮篆委
丁桂智署理又片奏新授藩司剛毅業已到任 臣 署日行公事
檄委代行代拆又片奏瘴故遊擊劉古春等十八員請卹 二
十一至二十五等日法人屢由水路援宣光劉永福擊破之擒
斬數十人溺斃數百計奪東京船二十餘隻 十月初四日馳
奏疊破宣光法援憑陳餉源枯竭懇催迅速籌解一摺附片
招安客民添募粵勇業經照辦又片奏鮑超一軍可否改調

洋差遣以紓澳餉又片奏雲南火藥局失慎請將管理各員議處又片奏越營長夫難募請加給價銀自九月杪連日陰雨河水驟漲法得以兵輪駛近宣光入城接濟我軍飲河水患病多死者公甚憂之二十五日馳摺奏劉永福所部接奉獎賞行知叩謝

天恩並陳明近日戰守情形附片奏瘴故記名提督蕭祥勝等四十三員請卹二十六日馳摺奏遵

旨查明由暹羅進攻西貢窒礙難行附片奏四川巴蠻竄擾巧家廳屬官軍土目合勦蠻衆投誠地方安靖十一月初五日宣光法人乘霧出撲我軍營壘劉永福唐景崧等夾擊卻之初九

日公添派總兵丁槐帶三千人至宣光會勦 二十日馳摺奏
宣光法匪出犯官軍夾擊大挫克鋒附片奏查明由車里老搗
進攻順化窒礙難行又片奏瘴故揀選知縣石潤芷等二十一
員請卹 二十八日公移駐館司開派總兵何秀林所部三千
餘人赴宣光協堵法援派同知潘德繼率新募粵勇一千二百
人歸唐景崧兼統派提督楊國發所部一千二百人防守道岸
浪泊 劉永福舊部頭目王玉珠黃功詠陳二記越南頭目張
文擎阮文美等前陷於法公招徠之皆率部來歸王玉珠弁焚
燬法壘殺其酋目收復山西屬之美良縣 十二月初八日奉
到十一月二十四日

旨曾紀澤電稱旁報法新兵鄂首派六千兵躡越另派六千續往
接乘雨發前進我軍出越又云擬取道陸岸繞出北里華兵之後
使不戰自潰西人以我兵心易亂慣用此間道等語敵情叵測著
李毓英潘鼎新嚴備並力籌攻取彼如繞出北里正可斷其歸路
出奇制勝須相機妥辦張之洞催馮子材王孝祺兩軍迅速到防
欽此又奉

旨宣光接獲情形若何著李毓英電奏聞丁槐至宣光與劉永福黃
守忠首意見該督妥籌務使和衷毋得貽誤欽此 初十日隨摺
奏添派官軍圍攻宣光並招撫降目收復美良縣附片奏劉永
福軍餉歸滇劃撥又摺奏查明各案出力武職人員開單請獎

十一日至十五日丁槐何秀林唐景崧各軍攻平宜光城外
彌壘偏城開挖地道 法人犯美良縣錫溪縣田園社我軍皆
擊走之 二十七日馳摺奏官軍連日血戰堵平宜光城外法
壘現在偏城開挖地道附片奏委新授昭通鎮總兵何雄輝募
勇勇五營赴越差遣又片奏鮑超軍餉請另籌撥又片奏丁槐
劉永福分任堵勒尙無貽誤又片奏委知府黃金銜等辦理轉
運